



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ
ՔՆՆՈՂ ԱՆՁ**

ք. Երևան

02.07.2018թ.

Ո Ր Ո Շ ՈՒ Մ

**ՀՀ գնումների հետ կապված բողոքներ քննող անձի
թիվ ՍՑ-ԱՄ-2018/88**

Հայաստանի Հանրապետության գնումների հետ կապված բողոքներ քննող անձ Միեր Անանյանս, ուսումնասիրելով Հայաստանի Հանրապետության ֆինանսների նախարարության 15.06.2018թ. թիվ 03/26-3/10940-18 գրությամբ «Տելիա-Մեդ» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգով ներկայացված հիմքերը, պարզեցի հետևյալը.

1. ՀՀ ֆինանսների նախարարության ներկայացրած փաստերը և պահանջը.

ՀՀ ֆինանսների նախարարությունը, ՀՀ պաշտպանության նախարարության 11.06.2018թ. թիվ ԴՎԱ/2096 գրության հիման վրա, 15.06.2018թ. թիվ 03/26-3/10940-18 գրությամբ դիմել է ՀՀ գնումների հետ կապված բողոքներ քննող անձին՝ խնդրելով նախաձեռնել «Տելիա-Մեդ» ՓԲԸ-ին (այսուհետ՝ Ընկերություն) գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

2. «Տելիա-Մեդ» ՓԲԸ-ի ներկայացրած փաստաթղթերը և դիրքորոշումը.

«Տելիա-Մեդ» ՓԲԸ-ն ՀՀ գնումների հետ կապված բողոքներ քննող անձին ուղղված 19.06.2018թ. գրությամբ հայտնել է, որ բացակայում են իրավական հիմքերը Ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառելու որոշում կայացնելու համար հետևյալ հիմնավորմամբ.

Գնման ընթացակարգի առարկան է համարվել ՀՀ պաշտպանության նախարարության կարիքների համար «վիրաբուժական թելերի» ձեռքբերումը, որը «ՀՀ ՊՆ ՆՏԱԴ-ԳՀԱՊՁԲ-9/21» ծածկագրով իրականացվել է գնանշման ձևով մեկ չափաբաժնով՝ «Սինթետիկ չներծծվող մոնոֆիլամենտ վիրաբուժական կարանյութ պատրաստված պոլիպրոպիլենից 2-0» անվամբ:

Ընկերությունը մասնակցել է «ՀՀ ՊՆ ՆՏԱԴ-ԳՀԱՊՁԲ-9/21» գնման ընթացակարգին, որի արդյունքում ճանաչվել է առաջին տեղ զբաղեցնող մասնակից:

Այնուհետև, գնահատող հանձնաժողովի կողմից ուսումնասիրվել են Ընկերության կողմից ներկայացված որակավորման փաստաթղթերը և պարզվել է, որ դրանցում առկա է երկու բնույթի անհամապատասխանություն՝

1. Ապրանքի նկարագրին վերաբերող.

2. Հարցման հիման վրա լիազոր մարմնից պարզվել է, որ Ընկերության՝ հայտը ներկայացվելուն նախորդող հաշվետու տարվա ընթացքում պարտավորությունների հաշվապահական հավելշոյին արժեքը գերազանցում է ակտիվների հաշվապահական հաշվեկշռային արժեքը:

Ընկերությունը անհամապատասխանությունների մասին ծանուցվել է էլեկտրոնային եղանակով՝ համաձայն 25.05.2018թ. ծանուցման:

Սահմանված ժամկետում, Ընկերության կողմից թերությունները շտկվել են, սակայն համաձայն գնահատող հանձնաժողովի 04.06.2018թ. N 6 արձանագրության՝ վերը նշված երկրորդ թերությունը չի շտկվել, որի պատճառով Ընկերության ներկայացրած փաստաթղթերը գնահատվել են հրավերի պահանջների չհապատասխանող և հայտը մերժվել է:

Որպես մերժման հիմք՝ արձանագրության մեջ նշված է, որ Ընկերությունը, որպես անհամապատասխանության հիմնավորում (պարտավորությունների հաշվապահական հաշվեկշռային արժեքը չի գերազանցում ակտիվների հաշվապահական հաշվեկշռային արժեքը), ներկայացրել է այնպիսի փաստաթուղթ, որտեղից չի երևում, թե որ ընկերությանն է վերաբերում:

Այսպիսով, գնահատող հանձնաժողովի մերժման միակ հիմքում դրված է այն, որ ոչ թե Ընկերության պարտավորությունների հաշվապահական հաշվեկշռային արժեքը գերազանցում է ակտիվների հաշվապահական հաշվեկշռային արժեքին, քանի որ այդ փաստի բացակայությունը հիմնավորվել է ներկայացված փաստաթղթից, այլ այն, որ ներկայացված փաստաթղթից չի երևում, թե որ Ընկերությանն է վերաբերում:

Համաձայն ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի (այսուհետ՝ Կարգ) 63-րդ կետի՝ մասնակիցների «ֆինանսական միջոցներ» չափանիշը գնահատվում է երկու մասով՝

ա. երեք հաշվետու տարիների համախառն եկամտի հանրագումարը պակաս չէ ներկայացված գնային առաջարկից,

բ. հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը:

Համաձայն Կարգի 43-րդ կետի՝

«43. Հայտերի բացման նիստի ավարտից հետո ոչ ուշ քան հաջորդող աշխատանքային օրը հանձնաժողովի քարտուղարը՝

...

3) էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը.»:

44. Կոմիտեն սույն կարգի 43-րդ կետի 3-րդ ենթակետով նախատեսված հարցումն ստանալու օրվանից երեք աշխատանքային օրվա ընթացքում էլեկտրոնային փոստի միջոցով տրամադրում է հարցման մասին տեղեկատվություն: ... Սույն կետով նախատեսված որակավորման չափանիշի գնահատման ժամանակ հաշվի է առնվում սույն կարգի 47-րդ կետով նախատեսված ընթացակարգը:

47. ... կոմիտեի կողմից տրամադրված որակավորման չափանիշները հիմնավորող՝ հրավերով նախատեսված փաստաթղթերի, ... գնահատման արդյունքում հրավերի պահանջների նկատմամբ անհամապատասխանություններ արձանագրվելու դեպքում հանձնաժողովի քարտուղարը նույն օրն էլեկտրոնային եղանակով ծանուցում է առաջին տեղն զբաղեցրած մասնակցին՝ առաջարկելով մեկ աշխատանքային օրվա ընթացքում շտկել անհամապատասխանությունը: «Ֆինանսական միջոցներ» որակավորման չափանիշի մասով արձանագրված անհամապատասխանությունը կարող է շտկվել ինչպես առաջին տեղը զբաղեցրած մասնակցի կողմից կոմիտեից ստացված գրավոր տեղեկատվությունը գնահատող հանձնաժողովին ներկայացմամբ, այնպես էլ կոմիտեի կողմից տրված նոր տեղեկատվությամբ:...»

Վերը նշված նորմերի վերլուծությունը ցույց է տալիս, որ Ընկերությունը քննարկվող անհամապատասխանության շտկման հիմնավորման համար կարող էր գնահատող հանձնաժողովին ներկայացնել Կոմիտեից ստացված տեղեկատվությունը, ընդ որում, որևէ պահանջ, որ տվյալ տեղեկատվությունը պարունակող փաստաթուղթը պետք է հատուկ պարունակի Ընկերության անունը կամ այլ ձևով ներկայացվի, բացակայում է:

Անգամ, եթե գնահատող հանձնաժողովը որոշեր, որ պետք է պարզի, թե արդյոք Ընկերությանն է վերաբերում, թե ոչ ներկայացված փաստաթուղթը, նա կարող էր պահանջել փաստաթղթի բնօրինակը: Միակ պահանջը այն է, որ պետք է հիմնավորվի Կոմիտեից ստացված լինելը, որն էլ որ Ընկերության կողմից կատարվել էր սույն գործով:

«Ֆինանսական միջոցներ» որակավորման չափանիշի մասով արձանագրված անհամապատասխանության շտկման առանձնահատկությունը կայանում է նրանում, որ թերության շտկումը փաստացի տեղի է ունենում ոչ թե Մասնակցի կողմից փաստաթղթեր ներկայացնելով գնահատող հանձնաժողովին, այլ համապատասխան տեղեկատվությունը

մուտքագրելով Պետական եկամուտների կոմիտե, որի բազայում կկատարվեն համապատասխան փոփոխություններ:

Հետևաբար, հնարավոր թերությունը (կամ թերությունը չշտկելը) կարող էր համարվել ոչ թե հիմնավորող փաստաթղթի վրա Ընկերության անվան բացակայությունը, այլ այն, որ Պետական եկամուտների կոմիտեում համապատասխան փոփոխությունը կատարված չլիներ:

Մինչդեռ, Ընկերության կողմից ներկայացված փաստաթուղթը կրում էր պետական եկամուտների կոմիտեի կնիքը (բոլոր դեպքերում, սույն դիրքորոշմանը կից ներկայացվում է փաստաթղթի ամբողջական տարբերակը):

Հակառակ պարագայում, ստացվում է, որ Ընկերությունը իրականում բավարարում է հրավերի պահանջները, սակայն վերջինիս հայտը մերժվում է:

Կարգը, նման իրավիճակների համար սահմանում է ստուգման հնարավորություն՝ պարզելու մասնակցի կողմից ներկայացված փաստաթղթի՝ իրականության համապատասխանությունը: Մասնավորապես, Կարգի 67-րդ կետի համաձայն.

«67. Գնահատող հանձնաժողովը կարող է ստուգել մասնակցի ներկայացրած տվյալների իսկությունը՝ օգտագործելով պաշտոնական աղբյուրներից ստացված տվյալներ կամ դրա մասին ստանալով իրավասու մարմինների գրավոր եզրակացությունը: ...Եթե մասնակցի ներկայացրած տվյալների իսկության ստուգման արդյունքում տվյալները որակվում են իրականությանը չհամապատասխանող, ապա տվյալ մասնակցի հայտը մերժվում է:»:

Միևնույն ժամանակ, Կարգը որևէ կերպ իրավունք չի տալիս գնահատող հանձնաժողովին ինքնուրույն որոշել, թե արդյոք ներկայացված փաստաթղթի տվյալները համապատասխանում են իրականության, թե ոչ, քանի դեռ չկա անհրաժեշտ տեղեկատվություն:

Փաստորեն, սույն գործով գնահատող հանձնաժողովը մերժման հիմքում դրվել է, ոչ թե այն որ փաստաթուղթ չի ներկայացվել, այլ այն որ Ընկերության անունը նշված չէ փաստաթղթում: Ընկերությունը շտկել է թերությունը՝ այդ փաստաթուղթը ներկայացնելով, բնականաբար, իր անունից և իրեն վերաբերող: Հետևաբար, գնահատող հանձնաժողովի մերժման որոշումը համազոր է Ընկերության կողմից փաստաթղթում ներկայացված

տվյալը իրականությանը չհամապատասխանելու փաստը ճանաչելուն, որը ինչպես արդեն իսկ նշվեց վերևում, կարող էր կատարվել միայն երրորդ անձանց կողմից ստացված տեղեկատվության հիման վրա կատարված հարցմամբ, որը չի կատարվել:

Ավելին, պետք է նշել, որ փաստաթղթի մյուս էջերը չէին ներկայացվել առկա տեղեկատվությունը կոնֆիդենցիալ պահելու նպատակով, հատկապես հաշվի առնելով այն, որ դրանք նշանակություն չեն կարող ունենալ գնահատող հանձնաժողովի համար և քարտուղարի հետ պայմանավորվածություն էր ձեռքերվել, որ բնօրինակն ամբողջությամբ կներկայացվի նիստի ընթացքում, սակայն Ընկերությունը այդպես էլ չի ծանուցվում նիստի մասին և հնարավորություն չի ունեցել այն ներկայացնել:

Տեսականորեն, եթե անգամ ընդունվի, որ գնահատող հանձնաժողովի գործողությունները իրավաչափ են եղել, ապա բոլոր դեպքերում սույն գործով նշանակություն ունի հետևյալ հարցադրման պատասխանը, թե արդյոք մասնակիցը կատարել է այնպիսի գործողություն, որը հանգեցրել է գնման պարտավորության խախտման և որի արդյունքում մասնակիցը պետք է ընդգրկվի գնումների գործընթացին մասնակցելու իրավունք չունեցող անձանց ցուցակում:

Վերոգրյալից հետևում է, որ իրականում Ընկերությունը հաշվեկշռային բացասական տարբերություն չի ունեցել, և մերժման միակ հիմքը համարվել է տեղիսնիկական հարց, երբ ներկայացված փաստաթղթից պարզ չի եղել, թե որ Ընկերությանն է դա վերաբերում:

Քանի որ, ըստ էության ներկայումս առկա է երկու տեղեկատվություն հաշվեկշռային տարբերության վերաբերյալ, անհրաժեշտ է նաև հարցում կատարել լիազոր մարմին վերջնական և ճշգրիտ տեղեկատվությունը ստանալու համար, որի հետո էլ պարզ կլինի գնման պարտավորության խախտումը, թեկուզև սույն դիրքորոշմանը կից արդեն իսկ ներկայացվում է հաշվարկների ճշգրտման արդյունքում լիազոր մարմնի կողմից հաստատված փաստաթուղթը, որի համաձայն հաշվեկշռային բացասական տարբերությունը բացակայում է:

Ընկերությունը ՀՀ գնումների հետ կապված բողոքներ քննող անձին խնդրել է հարցում կատարել լիազոր մարմին՝ պարզելու, թե արդյոք 2017 թվականի հաշվետու տարվա ընթացքում «Տելիա-Մեդ» ՓԲԸ-ի պարտավորությունների հաշվեկշռային արժեքը գերազանցել են ակտիվների հաշվեկշռային արժեքը, թե ոչ: Ընկերությունը խնդրել է նաև

մերժել «Տելիա-Մեդ» ՓԲԸ-ին գնումների գործընթացին մասնակցելու իրավունք չունեցող մասնակիցների ցուցակում ներառելը:

3. ՀՀ պաշտպանության նախարարության կողմից ներկայացված փաստարկները և դիրքորոշումը.

ՀՀ պաշտպանության նախարարությունը (այսուհետ՝ Պատվիրատու) ՀՀ ֆինանսների նախարարությանն ուղղված 11.06.2018թ. թիվ ԴՎԱ/2096 գրությամբ հայտնել է, որ ՀՀ ՊՆ կարիքների համար վիրաբուժական թելերի գնման «ՀՀ ՊՆ ՆՏԱԴ-ԳՀԱՊՁԲ-9/21» ծածկագրով գնանշման հարցման ընթացակարգին (այսուհետ՝ Ընթացակարգ) հայտ են ներկայացրել թվով 4 մասնակիցներ, այդ թվում՝ «Տելիա-Մեդ» ՓԲԸ-ն:

Ընթացակարգի 1-ին չափաբաժնի մասով «Տելիա-Մեդ» ՓԲԸ-ն գնահատող հանձնաժողովի կողմից ճանաչվել է առաջին տեղ զբաղեցրած մասնակից: Գնահատող հանձնաժողովի առաջարկի հիման վրա Ընկերությունը սահմանված ժամկետում և կարգով ներկայացրել է Ընթացակարգի հրավերի 2-րդ մասի՝ հայտը պատրաստելու հրահանգի 3-րդ կետով նախատեսված որակավորման փաստաթղթերը: Ընկերության կողմից ներկայացված փաստաթղթերի, ինչպես նաև ՀՀ ԿԱ պետական եկամուտների կոմիտեից ներկայացված համապատասխան եզրակացության գնահատման արդյունքում հանձնաժողովն արձանագրել է, որ դրանցում առկա են անհամապատասխանություններ:

Հիմք ընդունելով ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 47-րդ կետը՝ հանձնաժողովը 25.05.2018թ. ժամը 11:30-ին կայացած նիստում որոշել է մեկ աշխատանքային օրով կասեցնել նիստը և առաջարկել Ընկերությանը մինչև կասեցման ժամկետի ավարտը շտկել առկա անհամապատասխանությունները:

Սահմանված ժամկետում «Տելիա-Մեդ» ՓԲԸ-ի կողմից շտկվել են արձանագրված ոչ բոլոր անհամապատասխանությունները (մանրամասն տեղեկությունները ներառված են կից ներկայացվող հանձնաժողովի նիստերի արձանագրություններում):

Հիմք ընդունելով Կարգի 48-րդ կետի 2-րդ ենթակետը՝ հանձնաժողովը որոշել է Ընկերության ներկայացրած փաստաթղթերը գնահատել հրավերի պահանջներին ոչ

համապատասխան և վերջինիս հայտը մերժել, միաժամանակ, Ընկերության տվյալները գնման գործընթացին մասնակցելու իրավունք չունեցող մասնակիցների ցուցակում ներառելու գործընթաց նախաձեռնելու նպատակով ուղարկել ՀՀ ֆինանսների նախարարություն:

4. ՍՑ-ԱՄ-2018/88 ընթացակարգի քննության համար էական նշանակություն ունեցող փաստերը.

ՍՑ-ԱՄ-2018/88 ընթացակարգի քննության համար էական նշանակություն ունեն հետևյալ փաստերը՝

1. ՀՀ պաշտպանության նախարարության կողմից ՀՀ պաշտպանության նախարարության կարիքների համար կազմակերպվել է «ՀՀ ՊՆ ՆՏԱԴ-ԳՀԱՊՁԲ-9/21» ծածկագրով գնանշման հարցման ընթացակարգ, որին մասնակցելու նպատակով ի թիվս այլ մասնակիցների 09.04.2018թ. հայտ է ներկայացրել «Տելիա-Մեդ» ՓԲԸ-ն:

2. Ընթացակարգի գնահատող հանձնաժողովի 11.05.2018թ. ժամը 11:00-ի նիստի թիվ 3 արձանագրության 3-րդ կետի համաձայն՝ գնահատող հանձնաժողովի 14.05.2018թ. որոշմամբ «Տելիա-Մեդ» ՓԲԸ-ն ճանաչվել է առաջին տեղ զբաղեցրած մասնակից, որին սահմանված կարգով ծանուցվել է որակավորման չափանիշները հիմնավորող հրավերով նախատեսված փաստաթղթերը, ինչպես նաև ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 32-րդ 1-ին ենթակետի «զ» պարբերությամբ նախատեսված փաստաթուղթը ներկայացնելու անհրաժեշտության վերաբերյալ:

3. ՀՀ ԿԱ պետական եկամուտների կոմիտեի կողմից ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 44-րդ կետի հիման վրա 18.05.2018թ. տրամադրված եզրակացության համաձայն՝ **«Տելիա-Մեդ» ՓԲԸ-ի հայտը ներկայացվելուն նախորդող հաշվեկշիռի տարվա ընթացքում պարտավորությունների հաշվապահական հաշվեկշռային արժեքը կազմել է 198 799 991 ՀՀ դրամ, իսկ ակտիվների հաշվապահական հաշվեկշռային արժեքը՝ 118 060 883 ՀՀ դրամ:**

4. Ընթացակարգի գնահատող հանձնաժողովի քարտուղարը 25.05.2018թ. սահմանված կարգով Armeps համակարգի միջոցով ծանուցել է «Տելիա-Մեդ» ՓԲԸ-ին, հայտնելով որ Ընկերության կողմից ներկայացված որակավորման փաստաթղթերում առկա են անհամապատասխանություններ, ինչպես նաև ՀՀ ԿԱ պետական եկամուտների կոմիտեի՝ Կարգի 44-րդ կետով նախատեսված համապատասխան եզրակացության համաձայն «Տելիա-Մեդ» ՓԲԸ-ն ՀՀ պետական բյուջեի նկատմամբ հայտը ներկայացնելու օրվա դրությամբ ժամկետանց հարկային պարտավորություններ չունի, սակայն Ընկերության հայտը ներկայացվելուն նախորդող հաշվետու տարվա ընթացքում պարտավորությունների հաշվապահական հաշվեկշռային արժեքը գերազանցում է ակտիվների հաշվեկշռային արժեքը, այսինքն «Տելիա-Մեդ» ՓԲԸ-ի հայտը չի համապատասխանում հրավերի 2.5-րդ կետի 3-րդ ենթակետի «ա» պարբերության պահանջներին:

Վերոհիշյալ ծանուցմամբ Ընկերությանն առաջարկվել է մեկ աշխատանքային օրյա ժամկետում շտկել անհամապատասխանությունները:

5. Ընթացակարգի գնահատող հանձնաժողովի 04.06.2018թ. ժամը 11:30-ի նիստի թիվ 6 արձանագրության 1-ին կետի 1.1 ենթակետի համաձայն՝ քննարկելով «Տելիա-Մեդ» ՓԲԸ-ի կողմից որպես «Ֆինանսական միջոցներ» որակավորման չափանիշի շտկում ներկայացված փաստաթուղթը՝ գնահատող հանձնաժողովը որոշել է գնահատել այն ոչ բավարար, քանի որ ներկայացված փաստաթղթի բովանդակությունից պարզ չէ, թե որ կազմակերպության տվյալներն է այն ներառում: Նույն արձանագրությամբ Ընկերության հայտը մերժվել է:

5. ՀՀ ԿԱ պետական եկամուտների կոմիտեի 25.06.2018թ. թիվ 1/6-1/34878-18 գրության համաձայն՝ **«Տելիա-Մեդ» ՓԲԸ-ն 24.05.2018թ. ներկայացրել է շահութահարկի ճշգրտված հաշվարկ 2017թ. համար, ըստ որի ակտիվների հաշվեկշռային արժեքը կազմել է 168 060 883 ՀՀ դրամ, իսկ պարտավորությունների հաշվեկշռային արժեքը՝ 158 765 541 ՀՀ դրամ:**

5. ՀՀ գնումների հետ կապված բողոքներ քննող անձի հիմնավորումները և եզրահանգումը.

ՀՀ գնումների հետ կապված բողոքներ քննող անձ՝ Մհեր Անանյանս, ուսումնասիրելով ՀՀ ֆինանսների նախարարության 15.06.2018թ. թիվ 03/26-3/10940-18 գրությունը, ՀՀ պաշտպանության նախարարության 11.06.2018թ. թիվ ԴՎԱ/2096 գրությունը և կից փաստաթղթերը, ՀՀ ԿԱ պետական եկամուտների կոմիտեի 25.06.2018թ. թիվ 1/6-1/34878-18 գրությունը, հայտնում եմ հետևյալը.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի համաձայն՝ բացառությամբ նույն օրենքի 23-րդ հոդվածի 1-ին մասի 1-ին, 3-րդ, 4-րդ և 5-րդ կետերով նախատեսված ընթացակարգով գնում կատարելու դեպքերի, գնումների ընթացակարգերին մասնակցելու իրավունք չունեն այն անձինք, որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Օրենքի 6-րդ հոդվածի 2-րդ մասը սահմանում է, որ գնումների գործընթացին մասնակցելու իրավունքից զրկված մասնակցի վերաբերյալ ունեցած տեղեկությունների հիման վրա լիազորված մարմինը ընթացակարգ է նախաձեռնում գնումների հետ կապված բողոքներ քննող մարմնում՝ առանց վճարի: Տվյալ մասնակցի կարծիքը լսելուց հետո գնումների հետ կապված բողոքներ քննող անձը սույն օրենքի 50-րդ հոդվածի 6-րդ մասով սահմանված ժամկետում որոշում է կայացնում մասնակցին սույն հոդվածով

նախատեսված ցուցակում ընդգրկելու վերաբերյալ: Անձը նշված ցուցակում ընդգրկվում է երկու տարի ժամկետով:

ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 32-րդ կետի 1-ին ենթակետի համաձայն՝ հրավերով նախատեսվում է նաև, որ մասնակիցը հայտով ներկայացնում է՝ իր կողմից հաստատված հայտարարություն՝ հրավերով սահմանված մասնակցության իրավունքի և որակավորման չափանիշներին իր համապատասխանության մասին:

Կարգի 43-րդ կետի 3-րդ ենթակետի համաձայն՝ հայտերի բացման նիստի ավարտին հաջորդող աշխատանքային օրը հանձնաժողովի քարտուղարը էլեկտրոնային փոստի միջոցով Հայաստանի Հանրապետության կառավարությանն առընթեր պետական եկամուտների կոմիտե (այսուհետ՝ կոմիտե) հարցում է ներկայացնում առաջին տեղն զբաղեցրած մասնակցի՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ՝ ներկայացնելով մասնակցի անվանումը և հարկ վճարողի հաշվառման համարը:

Կարգի 44-րդ կետի համաձայն՝ Կոմիտեն սույն կարգի 43-րդ կետի 3-րդ ենթակետով նախատեսված հարցումն ստանալու օրվանից երեք աշխատանքային օրվա ընթացքում էլեկտրոնային փոստի միջոցով տրամադրում է հարցման մասին տեղեկատվություն: Սույն կետով սահմանված ժամկետում կոմիտեից տեղեկատվության չստացման դեպքում մասնակցի ներկայացրած հայտարարությունները համարվում են իրականությանը համապատասխանող: Եթե կոմիտեի կողմից սահմանված ժամկետից ուշ ներկայացված տեղեկատվությամբ արձանագրվում է, որ առաջին տեղն զբաղեցրած մասնակիցը հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ունեցել է օրենքով նախատեսված շեմը գերազանցող ժամկետանց պարտավորություններ կամ չի բավարարում հրավերով «ֆինանսական միջոցներ» որակավորման չափանիշի պահանջները, և պայմանագիրը կնքված չէ, ապա տվյալ մասնակցի հայտը մերժվում է: Եթե սահմանված ժամկետում տրամադրված տեղեկատվության արդյունքում մասնակցի ներկայացրած հայտարարությունը որակվում է

իրականությանը չհամապատասխանող, ապա հայտերի գնահատման նիստում հանձնաժողովի որոշմամբ տվյալ մասնակցի հայտը մերժվում է՝ անկախ մասնակցի կողմից կոմիտեի տրամադրած տեղեկատվությունից տարբերվող տեղեկատվություն ներկայացվելու հանգամանքից: Սույն կետով նախատեսված որակավորման չափանիշի գնահատման ժամանակ հաշվի է առնվում սույն կարգի 47-րդ կետով նախատեսված ընթացակարգը:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով, գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում գրավոր տրամադրում է գնումների բողոքարկման խրոհրդին: Սույն կարգի 44-րդ կետով սահմանված՝ մասնակցության իրավունք չունենալու հիմքերի առկայության դեպքում սույն կետով նախատեսված տվյալները չեն ներկայացվում լիազորված մարմին, եթե մասնակիցը կամ կոմիտեն լրացուցիչ տեղեկատվությունը ներկայացրել է մինչև հայտերի գնահատման արդյունքների հաստատման նիստին հաջորդող երրորդ աշխատանքային օրը: Լրացուցիչ տեղեկատվությունը ներկայացվում է ինչպես առաջին տեղը զբաղեցրած մասնակցի կողմից՝ կոմիտեից ստացված գրավոր տեղեկատվությունը գնահատող հանձնաժողովին ներկայացմամբ, այնպես էլ կոմիտեի կողմից տրված նոր տեղեկատվությամբ: Ընդ որում, գնահատող հանձնաժողովի կամ քարտուղարի կողմից կոմիտեին կրկնակի հարցում չի կատարվում:

Կարգի 47-րդ կետի համաձայն՝ Առաջին տեղն զբաղեցրած մասնակցի կողմից փաստաթղթերն ամբողջական չներկայացվելու, ինչպես նաև ներկայացված՝ ներառյալ կոմիտեի կողմից տրամադրված որակավորման չափանիշները հիմնավորող՝ հրավերով նախատեսված փաստաթղթերի, իսկ ապրանքների գնման դեպքում նաև սույն կարգի 32-րդ կետի 1-ին ենթակետի «գ» պարբերությամբ նախատեսված փաստաթղթի գնահատման արդյունքում հրավերի պահանջների նկատմամբ անհամապատասխանություններ արձանագրվելու դեպքում հանձնաժողովի քարտուղարը նույն օրն էլեկտրոնային եղանակով ծանուցում է առաջին տեղն զբաղեցրած մասնակցին՝ առաջարկելով մեկ աշխատանքային օրվա ընթացքում շտկել անհամապատասխանությունը: «Ֆինանսական

միջոցներ» որակավորման չափանիշի մասով արձանագրված անհամապատասխանությունը կարող է շտկվել ինչպես առաջին տեղը զբաղեցրած մասնակցի կողմից կոմիտեից ստացված գրավոր տեղեկատվությունը գնահատող հանձնաժողովին ներկայացմամբ, այնպես էլ կոմիտեի կողմից տրված նոր տեղեկատվությամբ: Ընդ որում, գնահատող հանձնաժողովի կամ քարտուղարի կողմից կոմիտեին կրկնակի հարցում չի կատարվում:

Կարգի 48-րդ կետի 2-րդ ենթակետի համաձայն՝ առաջին տեղն զբաղեցրած մասնակցի կողմից արձանագրված անհամապատասխանությունը սահմանված ժամկետում չշտկելու դեպքում հանձնաժողովի որոշմամբ հայտը մերժվում է, և փաստաթղթեր ներկայացնելու պահանջ է ներկայացվում հաջորդաբար տեղ զբաղեցրած մասնակցին:

Կարգի 63-րդ կետի 1-ին ենթակետի «բ» պարբերության համաձայն՝ մասնակիցների՝ օրենքի 6-րդ հոդվածի 3-րդ մասի 4-րդ կետով նախատեսված՝ «Ֆինանսական միջոցներ» չափանիշը գնահատվում է հետևյալ կարգով՝ հրավերով պահանջվում է, որ Հայաստանի Հանրապետության ռեզիդենտ հանդիսացող մասնակիցը, բացառությամբ անհատ ձեռնարկատեր չհանդիսացող ֆիզիկական անձի, հայտով ներկայացնում է հայտարարություն այն մասին, որ որ իր կողմից հայտը ներկայացվելուն նախորդող հաշվետու տարվա ընթացքում պարտավորությունների հաշվեկշռային արժեքը չի գերազանցել ակտիվների հաշվեկշռային արժեքը:

«Այաշտպանության նախարարության կողմից ՀՀ պաշտպանության նախարարության կարիքների համար կազմակերպվել է «ՀՀ ՊՆ ՆՏԱԴ-ԳՀԱՊՁԲ-9/21» ծածկագրով գնանշման հարցման ընթացակարգ, որին մասնակցելու նպատակով հայտ է ներկայացրել «Տելիա-Մեդ» ՓԲԸ-ն:

Ընկերությունը հայտի թիվ 3 հավելվածով հայտարարել և հավաստել է, որ որ բավարարում է «ՀՀ ՊՆ ՆՏԱԴ-ԳՀԱՊՁԲ-9/21» ծածկագրով գնանշման հարցման հրավերով սահմանված որակավորման չափանիշների պահանջներին և պարտավորվում է առաջին տեղը զբաղեցրած մասնակից ճանաչվելու դեպքում նշված ծածկագրով գնանշման հարցման հրավերով սահմանված կարգով և ժամկետներում ներկայացնել որակավորումը հիմնավորող՝ հրավերով պահանջվող փաստաթղթերը:

Ընթացակարգի գնահատող հանձնաժողովի 11.05.2018թ. ժամը 11:00-ի նիստի թիվ 3 արձանագրության 3-րդ կետի համաձայն՝ գնահատող հանձնաժողովի 14.05.2018թ. որոշմամբ «Տելիա-Մեդ» ՓԲԸ-ն ճանաչվել է առաջին տեղ զբաղեցրած մասնակից, որին սահմանված կարգով ծանուցվել է որակավորման չափանիշները հիմնավորող հրավերով նախատեսված փաստաթղթերը, ինչպես նաև ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 32-րդ 1-ին ենթակետի «զ» պարբերությամբ նախատեսված փաստաթուղթը ներկայացնելու անհրաժեշտության վերաբերյալ:

Մինևույն ժամանակ Ընթացակարգի գնահատող հանձնաժողովի քարտուղարը ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 43-րդ կետի 3-րդ ենթակետի հիման վրա համապատասխան հարցում է ներկայացրել ՀՀ պետական եկամուտների կոմիտե Ընկերության՝ հայտը ներկայացնելու օրվա դրությամբ հարկային մարմնի կողմից վերահսկվող եկամուտների գծով ժամկետանց պարտավորությունների, ինչպես նաև հրավերով «ֆինանսական միջոցներ» որակավորման չափանիշի գնահատման համար սահմանված պայմանների առկայության վերաբերյալ:

ՀՀ ԿԱ պետական եկամուտների կոմիտեի կողմից ՀՀ կառավարության 04.05.2017թ. N 526-Ն որոշմամբ հաստատված «Գնումների գործընթացի կազմակերպման» կարգի 44-րդ կետի հիման վրա 18.05.2018թ. տրամադրված եզրակացության համաձայն՝ **«Տելիա-Մեդ» ՓԲԸ-ի հայտը ներկայացվելուն նախորդող հաշվեկշիռի տարվա ընթացքում պարտավորությունների հաշվապահական հաշվեկշռային արժեքը կազմել է 198 799 991 ՀՀ դրամ, իսկ ակտիվների հաշվապահական հաշվեկշռային արժեքը՝ 118 060 883 ՀՀ դրամ:**

Ընթացակարգի գնահատող հանձնաժողովի 25.05.2018թ. ժամը 11:00-ի նիստի թիվ 5 արձանագրության 1-ին կետի 1.1 ենթակետի համաձայն՝ «Տելիա-Մեդ» ՓԲԸ-ի կողմից ներկայացված որակավորման փաստաթղթերում առկա են անհամապատասխանություններ, ինչպես նաև ՀՀ ԿԱ պետական եկամուտների կոմիտեի՝ Կարգի 44-րդ կետով նախատեսված համապատասխան եզրակացության համաձայն՝ «Տելիա-Մեդ» ՓԲԸ-ն ՀՀ պետական բյուջեի նկատմամբ հայտը ներկայացնելու օրվա դրությամբ ժամկետանց

հարկային պարտավորություններ չունի, սակայն Ընկերության հայտը ներկայացվելուն նախորդող հաշվետու տարվա ընթացքում պարտավորությունների հաշվապահական հաշվեկշռային արժեքը գերազանցում է ակտիվների հաշվեկշռային արժեքը:

Ընթացակարգի գնահատող հանձնաժողովը որոշել է կասեցնել նիստը և իսկ գնահատող հանձնաժողովի քարտուղարը Armeps համակարգով ոչ ավտոմատ ծանուցման եղանակով ծանուցել է Ընկերությանը՝ առաջարկելով շտկել վերոհիշյալ անհամապատասխանությունները:

Ընկերության կողմից որպես «Ֆինանսական միջոցներ» որակավորման չափանիշում արձանագրված անհամապատասխանության շտկում գնահատող հանձնաժողովին ներկայացվել է փաստաթուղթ, որում առկա է տեղեկատվություն ակտիվների և պարտավորությունների հաշվապահական հաշվեկշռային արժեքների և հարկային բազաների (հաշվետու տարվա վերջում) վերաբերյալ, միևնույն ժամանակ նշված փաստաթղթից պարզ չէ, թե ում կողմից է տրվել և ում վերաբերյալ:

Ընթացակարգի գնահատող հանձնաժողովի 04.06.2018թ. ժամը 11:30-ի նիստի թիվ 6 արձանագրության 1-ին կետի 1.1 ենթակետի համաձայն՝ քննարկելով «Տելիա-Մեդ» ՓԲԸ-ի կողմից որպես «Ֆինանսական միջոցներ» որակավորման չափանիշի շտկում ներկայացված փաստաթուղթը՝ գնահատող հանձնաժողովը որոշել է գնահատել այն ոչ բավարար, քանի որ ներկայացված փաստաթղթի բովանդակությունից պարզ չէ, թե որ կազմակերպության տվյալներն է այն ներառում: Նույն արձանագրությամբ Ընկերության հայտը մերժվել է:

«Վ» գնումների հետ կապված բողոքներ քննող անձը 15.06.2018թ. թիվ ԳԲԽ-ՄԱ/1/10925-18 գրությամբ դիմել է «Վ» ԿԱ պետական եկամուտների կոմիտեին՝ խնդրելով հայտնել, թե ինչքան է կազմում «Տելիա-Մեդ» ՓԲԸ-ի 2017 թվականի ընթացքում պարտավորությունների և ակտիվների հաշվեկշռային արժեքը:

Ի պատասխան «Վ» գնումների հետ կապված բողոքներ քննող անձի վերոհիշյալ գրության՝ «Վ» ԿԱ պետական եկամուտների կոմիտեն 25.06.2018թ. թիվ 1/6-1/34878-18 գրությամբ հայտնել է, որ **«Տելիա-Մեդ» ՓԲԸ-ի 16.04.2018թ. ներկայացրած շահութահարկի տարեկան հաշվարկով 2017թ. հաշվետու տարվա ընթացքում ակտիվների հաշվապահական հաշվեկշռային արժեքը կազմել է 118 060 883 ՀՀ**

դրամ, պարտավորությունների արժեքը՝ 198 799 991 ՀՀ դրամ: Ընկերության կողմից 24.05.2018թ. ներկայացվել է շահութահարկի ճշգրտված հաշվարկ 2017թ. համար, ըստ որի ակտիվների հաշվեկշռային արժեքը կազմել է 168 060 883 ՀՀ դրամ, իսկ պարտավորությունների հաշվեկշռային արժեքը՝ 158 765 541 ՀՀ դրամ:

«Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» ենթակետի համաձայն՝ մասնակիցը ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է գնման գործընթացի շրջանակում ստանձնած պարտավորությունը, որը հանգեցրել է գնման գործընթացին տվյալ մասնակցի հետագա մասնակցության դադարեցմանը:

Այսպիսով՝ համաձայն ՀՀ ԿԱ պետական եկամուտների կոմիտեի կողմից 18.05.2018թ. տրամադրված եզրակացության՝ «Տելիա-Մեդ» ՓԲԸ-ի հայտը ներկայացվելուն նախորդող հաշվետու տարվա ընթացքում պարտավորությունների հաշվապահական հաշվեկշռային արժեքը (198 799 991 ՀՀ դրամ) գերազանցել է Ընկերության ակտիվների հաշվապահական հաշվեկշռային արժեքը (118 060 883 ՀՀ դրամ), միևնույն ժամանակ ՀՀ ԿԱ պետական եկամուտների կոմիտեի 25.06.2018թ. թիվ 1/6-1/34878-18 գրության համաձայն՝ Ընկերության կողմից 24.05.2018թ. ներկայացվել է շահութահարկի ճշգրտված հաշվարկ 2017թ. համար, ըստ որի ակտիվների հաշվեկշռային արժեքը (է 168 060 883 ՀՀ դրամ) գերազանցում է պարտավորությունների հաշվեկշռային արժեքը (158 765 541 ՀՀ դրամ): Դրա հետ մեկտեղ նաև արձանագրում եմ, որ ՀՀ ԿԱ պետական եկամուտների կոմիտեի 25.06.2018թ. թիվ 1/6-1/34878-18 գրության համաձայն՝ Ընկերության կողմից շահութահարկի ճշգրտված հաշվարկը ներկայացվել է 24.05.2018թ., իսկ Ընթացակարգի գնահատող հանձնաժողովի կողմից արձանագրված թերությունները շտկելու վերաբերյալ ծանուցումը Ընկերությանն ուղարկվել է 25.05.2018թ., հետևաբար Ընկերությունը փաստացի Կարգի 47-րդ կետի հիման վրա կատարել է իր պարտականությունը և շտկել է արձանագրված անհամապատասխանությունը, որը հաստատվում է ՀՀ ԿԱ պետական եկամուտների կոմիտեի 25.06.2018թ. թիվ 1/6-1/34878-18 գրությամբ ներկայացված տեղեկատվությամբ:

Հաշվի առնելով վերոգրյալը, ինչպես նաև «Տելիա-Մեդ» ՓԲԸ-ի վարքագիծը, գտնում եմ, որ Ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառելու հիմքեր առկա չեն:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասի 2-րդ կետով՝

Ո Ր Ո Շ Ե Ց Ի

Հայաստանի Հանրապետության ֆինանսների նախարարության 15.06.2018թ. թիվ 03/26-3/10940-18 գրությամբ «Տելիա-Մեդ» ՓԲԸ-ին (ՀՎՀՀ՝ 01203143) գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը մերժել:

ՀՀ գնումների հետ կապված բողոքներ քննող անձի որոշումն իրավապարտադիր է:

ՀՀ գնումների հետ կապված բողոքներ քննող անձի որոշումը կարող է բողոքարկվել դատական կարգով:

**Գնումների հետ կապված
բողոքներ քննող անձ՝**



ՄՀԵՐ ԱՆԱՆՅԱՆ